



4. august 2016

Inatsisartut Suleriaasianni § 37 naapertorlugu Naalakkersuisunut apeqqut imaattoq matumuuna saqqummiuppara:

Ineqarnermut akiliisarnermut aalajangiisartoqatigiinnik pilersitsinissamut tunngasumik Naalakkersuisunut apeqquteqaat:

1. Naalakkersuisut ineqarnermut akiliisarnermut aaliangiisartoqatigiinnik pilersitsinissaminnik pilersaaruteqarnerlutik, isumannaarinnittusaaq namminersorlutik inissiaatillit ininut attartortunik akiliisitsivallaannginnissaannut? Kissaatigineqarpoq akissut akuersaarneruppat akuersaanngippalluunniit tunngavilersukkamik akineqarnissaa.

2. Naalakkersuisut piumaffigineqarput missingersuusiussallutik namminersorlutik inissiaatillit aallaavigalugit ineqarnikkut akiliisarnermut aaliangiisartoqatigiit ingerlannera qanoq akeqassanersoq. Naalakkersuisunut eqqarsaatersuutigineqaqquvuttaaq ineqarnikkut akiliisarnermut maalaaruteqarfiup aaliangiisartoqatigiivini pilersitsisoqassannginnersoq ineqarnermut maalaaruteqarfik pioreersoq ilalerlugu, taamatuttaarlu aningaasartuutit qanoq isikkoqassanersut.

3. Naalakkersuisut qanoq suliniuteqarfigaat isumannaassallugu ininik attartortitsisartut Nuummi inissanik amigaateqarneq aallaavigalugu ineqarnermut akiliisarneq qaffasitsippallaannginnissaat?

4. Naalakkersuisut pineqartumut allanik paasissutissiisinnaanerlutik?

(Inatsisartunut ilaasortaq Justus Hansen, Demokraatit)

Tunngavilersuut:

Aaliangersagaq § 82, imm.1 nr.2 12. maaji 2005 landstingip peqqussutaa malillugu allaqqavooq Namminersornerusut Kommunellu inissiaataanni attartortittakkani attartortut attartortitsisullu akornanni aaqqiagiinngissutit suliarineqarnissaannut Naalakkersuisut ineqarneq pillugu maalaaruteqartarfimmik pilersitsisinnaapput. Taamaattorli namminersortut inissiaataanni attartortut eqqartuussivimmuut innersuunneqartarlutik.

§§ 33-35 nr.2 12. maaji 2005 landstingip peqqussutaa malillugu allaqqavuttaaq inissiani attartortittakkani namminersortunit pigineqartuni ineqarnermut akiliut aningaasartuutit malillugit annertussusilerneqassaaq, taannalu attartortitsisup aningaasaliissutinut aningaasartuutigisaanit uppersarsarneqartunit. Ataatsimut isigalugu attartorneq aningaasartuutit aallaavigalugit ingerlavoq, aammalu takussutissaqarluni attartorneq attartortitsisup aningaasartuutaasa uppersarsaasigaanit tunuilaqutserneqartassasoq.

Ineqarnikkut niuernermi, ingammik Nuummi namminersorlutik inissiaatillit akinik qaffasissunik ingerlatsitsipput. Attartortitsinikkut akit ilaatigut ineqarnermut sillimasiisarneq pisortaqarfinnit pisartumit aningaaserneqartarsimassasut. Taamasilluni landskarsi / akileraartartut attartortitsisartut pissusissamisoorpallaanngitsumik iluanaarutaat aningaasalersoqataaffigalugit.



DEMOKRAATIT
DEMOKRATERNE

Demokraatit isaanniit ineqarnikkut akiliisarnermut maalaaruteqarfimmik pilersitsinikkut namminersorlutik inissiaatilinnut attartorneq pitsaanerusoq, akikinnerusoq paaseqatigiiffiunerusorlu anguneqarsinnaavoq.

Apeqqutinut akissut ullut suliffiusut qulit ingerlaneranni kissaatigineqarpoq.